





**Акафист**  
**святителю Макарию,**  
**митрополиту Московскому**  
**и всея России чудотворцу**

**Кондак 1**

---

Избранный и чудный архиерею Церкви Российския, града Москвы первопрестольниче, блаженне святителю Макарие! Восхваляем тя ныне мы, недостойнии, но, яко имея дерзновение у Святыя Троицы, предстательством твоим Небесным помогай нам, сущим в бедах и скорбех, радостно взывающим ти: Радуйся, блаженне Макарие, похвало церкви Христовы и предивный чудотворче.

**Икос 1**

---

Ангела земнаго и человека Небеснаго прославляем тя, яко ревнителя Православия: от земных бо к Небесным обителем возшел еси. И ныне, предстоя Престолу Святыя Троицы вкупе

с лики чудотворцев Российских, не престай  
моляся о воспевающих тя:

Радуйся, корене благаго ветве многоплодная;

Радуйся, благочестивых родителей плоде  
богодарованный.

Радуйся, от юности возлюбивый Бога всем  
сердцем твоим;

Радуйся, яко Ему Единому работати возжелел  
еси.

Радуйся, яко измлада мудрости прилежал еси;

Радуйся, поста и молитвы ревностный  
блюстителю.

Радуйся, блаженне Макарие, похвало Церкви  
Христовы и предивный чудотворче.

## **Кондак 2**

---

Видя тщету мирскаго жития, блаженне  
святителю Макарие, во ограду обители  
преподобнаго Пафнутия Боровскаго удалился  
еси, идеже имя египетскаго пустынника,  
монашествующих наставника, Макария  
Великаго, приял еси и, яко звезда небосветлая  
возрастая на тверди церковней, весь живот свой

от младых ногтей Богу предал еси, сердцем и усты непрестанно поя Ему: Аллилуиа.

## **Икос 2**

Разум твой богодухновенный, научением книжным в Пафнутиево-Боровстем монастыре просвещаемый, богомыслию предал еси, блаженне Макарие, молитвою и пощением во служение Богу себе уготовляя. Восхваляюще же ныне твоя благая тщания, взываем ти сице:

Радуйся, яко, отложив вся мирския сласти, Христов ярем носити изволил еси;

Радуйся, юность твою, яко жертву непорочну, отвержением мира Богу принесый.

Радуйся, в постех и подвизах твоих добродетельми украсивыйся;

Радуйся, ангельски во плоти поживый.

Радуйся, монашескаго послушания светлый облаче;

Радуйся, иноков обители Боровския украшение.

Радуйся, блаженне Макарие, похвало Церкви Христовы и предивный чудотворче.

## Кондак 3

---

Силою Вышняго, уготовлявшаго тя во спасение многих, досточудне святителю, ведом был еси от силы в силу во святем житии твоём, день и ночь поучался еси в Законе Господни, присно взывая Богу: Аллилуиа.

## Икос 3

---

Имея чистое житие и душу непорочну, в монашеския ризы облеклся еси, еще млад сый, и, подвигом добрым труждаяся, искус жестокаго жития прошед и саном архимандрита обители Лужецкия от первосвятителя Даниила почтен быв, ревностно подвизался еси о спасении Богом данного тебе стада словеснаго, с нимже и мы днесь радостно взываем:

Радуйся, красото смиренномудрия и воздержания;

Радуйся, образе кротости и послушания.

Радуйся, соборов иноческих похваление;

Радуйся, преподобных и праведных сонаследниче.

Радуйся, премудрый монахов наставниче;

Радуйся, добрый о них попечителю.

Радуйся, блаженне Макарие, похвало Церкви Христовы и предивный чудотворче.

#### **Кондак 4**

---

Бури страстей избежав, архипастырски трудился еси, святителю отче Макарие; достойный служитель святыя Софии, Премудрости Божия, явился еси и сокровища премудрости ревностно собирати потщался еси, ко просвещению народов российских, научая разумно пети Богу: Аллилуиа.

#### **Икос 4**

---

Слышавше ближнии и дальнии людие, дивляхуся о трудах твоих неустанных, имиже трудился еси на кафедре богоспасаемых градов Великаго Новаграда и Пскова, и радовахуся, яко приял еси жезл архипастыря от митрополита Российскаго Даниила. Мы же, овцы пажити твоя, светом твоего богоразумия озаряеми, вопием ти:

Радуйся, на престоле святительством достойно возседый;

Радуйся, архиерею и премудрый учителю.

Радуйся, в подвиге учительства неустанный ревнителю;

Радуйся, винограда Христова усердный делателю.

Радуйся, яко твоим благословением некрещеная лопь светом Евангелия просвещена бысть;

Радуйся, благочиния монастырскаго мудрый устроителю.

Радуйся, блаженне Макарие, похвало Церкви Христовы и предивный чудотворче.

### **Кондак 5**

---

Боготечному солнцу уподобился еси, блаженне Макарие, егда волею Пастыреначальника Христа на свещнице Церкви Российския собором архиереев поставлен был еси, да светиши светло отечеству твоему. Мы же Небесному Царю, Триединому Богу, дивно прославльшему тя, поем: Аллилуиа.

### **Икос 5**

---

Видевше тя православнии людие, яко светило безоблачно сияюща многими дарованьми, радовахуся. Ты же, добрый пастырю Христов, мучениколюбец сый, соборне уставил еси празднования творити святым новым чудотворцем земли нашея, ихже Господь Бог

прослави, якоже Своя угодники, многими различными чудесы и знаменьями. Мы же, чюдящися о таковой неизреченной благодати Божией, Церкви нашей Российстей дарованной, умильно взываем ти сице:

Радуйся, святителю, други Божия достолепно прославивый;

Радуйся, деяния подвижников российских писанию предавый.

Радуйся, труды и подвиги мужей святых в песнях славословивый;

Радуйся, образы новых чудотворцев благоговейно писавый и лобызавый.

Радуйся, научивый паству достойно поклоняться святым новым чудотворцем;

Радуйся, яко купно с сими святыми ныне и от нас славословие приемлещи.

Радуйся, блаженне Макарие, похвало Церкви Христовы и предивный чудотворче.

### **Кондак 6**

---

Проповедник веры Православныя и ревнитель благочестия словом и житием был еси, достославне святителю, блаженне Макарие,

потщался еси труды неленостными нравы и  
обычай людей российских исправить, научая  
непрестанно воспевати Богу: Аллилуиа.

## **Икос 6**

---

Возсиял еси, яко звезда лучезарная, в Церкви  
Российстей светом Христова учения и  
ревностию твоею о славе Божией, иерарше  
блаженне, и созвал еси великий собор, Стоглав  
нарицаемый, ко исправлению и утверждению в  
добродетелех верных чад, внимающих учению  
Христову и похваляющих тя сице:

Радуйся, благочиния церковнаго строгий  
блюстителю;

Радуйся, яко тобою вера Христова утвердися.

Радуйся, чтения и пения Божественнаго  
искусный учителю;

Радуйся, соблазнов и нестроений мудрый  
искоренителю.

Радуйся, яко страх Божий, начало  
премудрости, в сердцах пасомых насаждал еси;

Радуйся, яко праведныя жизни образ верным  
подавал еси.

Радуйся, блаженне Макарие, похвале Церкви Христовы и предивный чудо-творче.

### **Кондак 7**

---

Хотяй враг спасения рода человеческого нарушити мир Церкви нашея, воздвиже еретическое мудрование в людех о Божестве, и о Церкви, и о православных догматах веры христианския. Мы же, трепетни суще о таком злочестии, прославляем святителя Макария, православных догматов защитителя, взывающе Богу: Аллилуиа.

### **Икос 7**

---

Новаго ты Петра Александрийскаго и Николая Мирликийскаго зрим, святителю Макарие: овии отсекоша Ариа безумнаго, раздравшаго, яко ризу Церковь Христову, ты же еретическая лжемудрования соборне осудил еси, прелесть их посрамив да не сеют злобы своея в роде человечестем, и тако утвержден бысть истинный Закон Христов. Мы же, чада Церкви Православныя, благодарно прославляем тя, блаженне Макарие:

Радуйся, Православия великий ревнителю;

Радуйся, стада Христова от волков хищных  
верный оградителю.

Радуйся, жезлом догматов лжемудрствование  
посрамивый;

Радуйся, небрегущая о святыни от Церкви  
Божия отлучивый.

Радуйся, презрители законоположений  
церковных низложивый;

Радуйся, громе, поражаяй злочестивых.

Радуйся, блаженне Макарие, похвало Церкви  
Христовы и предивный чудотворче.

### **Кондак 8**

---

Странника и пришельца в мире сем себе  
помышляя, святителю отче наш Макарие, в  
подвизех и постех присно пребывая, кроток же,  
смирен и милостив был еси, отроком в незлобии  
подражая всегда, совершен умом быв, поя  
Всемилоствому Богу: Аллилуиа.

### **Икос 8**

---

Весь ум твой, святителю, вперил еси к Богу,  
пастырски врученное тебе от Христа стадо упасл  
еси: лица бо сильных не стыдятся, наставляя еси

их на путь спасения, его ради чтуще святую память твою, любовью ти вопием:

Радуйся, великий благочестия столпе;

Радуйся, святопомазанная главо, честный наш учителю.

Радуйся, Христа Господа всею душою и сердцем возлюбивый;

Радуйся, христианского благочестия истинный ревнителю.

Радуйся, неутомимый проповедниче Евангелия Христова;

Радуйся, камению драгий, всю землю Российскую украшаяй.

Радуйся, блаженне Макарие, похвало Церкви Христовы и предивный чудотворче.

### **Кондак 9**

Всего себе вперив в премудрость книжную, составил еси многими труды и подвиги Великия Четия Миней во славу Божию, в похвалу святых и в научение всему роду православному. Мы же, дивящися дарованней ти от Бога премудрости, прославляем тя, зовуще Богу: Аллилуиа.

## Икос 9

Витии любомудрии прославляют деяния славных мира сего, ты же, пчеле уподоблялся, воедино собирал еси жития иже в постех просиявших и за Христа кровь свою пролиавших. Мы же, писании твоими просвещаемы, поем и благодарим тя за толикие труды твоя и преусердно приносим ти сичевая:

Радуйся, книжную премудрость, яко бисер, собравый;

Радуйся, сокровища премудрости чадом Божиим явивый.

Радуйся, имиже люди российския просветивый;

Радуйся, деяния святых писанию предавый.

Радуйся, начало книгопечатанию положивый;

Радуйся, духовный пастырю словесных овец.

Радуйся, блаженне Макарие, похвало Церкви Христовы и предивный чудо-творче.

## Кондак 10

Спасти хотя душу твою, святителю, покоя духовнаго возжелел еси, хотя оставити первосвятительский престол и паству

российскую, но, умолен быв от собора святителей и самодержцем державным, показал еси нам пример послушания Церкви Христове, да поем Богу: Аллилуиа.

### **Икос 10**

---

Стена и крепкое ограждение земли Российской был еси, святителю, многими добродетельми украсивыйся, постнически пожив, течение скончав, ко отшествию от земнаго бытия приблизился еси и предал еси душу свою в руке Бога Жива. Собор же народа многа, стекшеся ко одру твоему и видевше лик твой, яко свет сияющий, чистаго и непорочнаго жития твоего ради, прославиша Бога, даровавшаго таковаго светильника, вопиюще:

Радуйся, святителю, пред кончиною твоею явления Богоматере сподобивыйся;

Радуйся, мирно и радостно час кончины твоея сретивый.

Радуйся, яко пресветлое житие твое на земли прешел еси;

Радуйся, святителю, и по смерти твоей нас не оставляяй.

Радуйся, яко и по преставлении твоём с нами пребываеши;

Радуйся, гражданинне Иерусалима Небеснаго.

Радуйся, блаженне Макарие, похвало Церкви Христовы и предивный чудотворче.

### **Кондак 11**

---

Пение наше молебное презри, богомудре и блаженне отче, любовьию подвизаеми, к честному образу твоему притекаем и, прославляюще Троидинаго Бога, молимтися: молися выну у Престола Господа Славы избавитися нам от мятежей и треволнений, да благодарне зовем Богу: Аллилуиа.

### **Икос 11**

---

Светодательная свеща явился еси стране нашей, Макарие чудный, и по смерти своей. Темже сиянием учений и трудов твоих озаряеми, почитаем святую память твою, просвети убо очи наша душевная, да благодарно взываем ти:

Радуйся, бедствия, грядущая на землю Россий-скую, предзревый;

Радуйся, о всех людех российских усердный молитвенниче.

Радуйся, вместо временных вечная блага нам подаваяй;

Радуйся, бисере честный, сиянием Небесных славы сердца наша увеселяяй.

Радуйся, светильниче многосветлый, светом истиннаго богопознания нас озаряяй;

Радуйся, святителей Московских достойный преемниче.

Радуйся, блаженне Макарие, похвало Церкви Христовы и предивный чудотворче.

### **Кондак 12**

---

Благодать Господню и благовременную помощь испроси нам, святителю Макарие, во дни нестроений и буди нам в скорбех утешитель и в бедах заступник. Молим тя, иерарше блаженне, пролей за нас теплую молитву ко Господу, да сохранит Церковь Российскую невреждену от ересей и расколов и спасет вопиющих Ему: Аллилуиа.

---

## Икос 12

Поюще преславное житие твое и богомудрая деяния, святителю отче Макарие, блаженству тезоименитый, восхваляем Подателя всех благих, Бога, даровавшего в последняя времена стране нашей великаго чудотворца. Озари, иерарше чудный, нас светоизлиянием твоея благодати, увеселяя сердца наша пети ти со умилением:

Радуйся, Православия поборниче  
нелицемерный;

Радуйся, архиереев доброто, священников и иноков похвало.

Радуйся, звездо, сияющая во тьме сущим;

Радуйся, первопастырю и учителю христоименитых людей земли нашея.

Радуйся, иконописче благоговеен, дела рук своих посвящаяй Богу;

Радуйся, от Царя Небеснаго венец славы приемый.

Радуйся, блаженне Макарие, похвало Церкви Христовы и предивный чудотворче.

## Кондак 13

---

О чудотворче преславный и боголюбезный пастырю, первопрестольниче изрядный, великое украшение церковное, всем архиереем и иереем неленостный учителю, всея российския паствы истинное управление, святителю Макарие чудный! Милостивно прием сие малое моление наше, в похвалу тебе приносимое, умоли Господа Бога даровати мир душам нашим, Церкви и стране, да взываем присно: Аллилуиа.

(Этот кондак читается трижды, затем икос 1 и кондак 1)

## Молитва

---

О великий святителю, Церкви Российския первопрестольниче, града Москвы пастырю и учителю, отче наш Макарие блаженне, добре подвиг жития твоего совершивый и дерзновение у Господа стяжавый! К тебе во умилении сердец наших припадаем и усердно молим: буди о нас теплый предстатель у Престола Вседержителя и умоли Всеблагаго Бога: да не презрит нас, во многая и лютыя грехи впадших, но дарует нам вся благая и потребная, яже ко спасению. Вемы бо, яко немощни есмы, но молим тя усердно, святителю Божий, предстательством твоим

сохрани невредимо всероссийскую паству, юже во святительстве твоем добре упасл еси. Архиреем и пресвитером у Господа испроси мудрость, во еже право правити слово Божественныя истины, жертвенную любовь и ревность о спасении, да не погибнет ни един от паствы их; иночествующих в подвизах укрепи, в мире живущим истинный и потребный им, иже во Христе Иисусе образ жительства покази; веру нашу укрепи, любви нелицемерней друг ко другу научи, в надежде на милосердие Божие утверди. Еще же молим тя, святителю, испроси нам у Всемилостиваго Бога духа разума и премудрости, да украсимся истинным боговедением спасительных писаний святых отец и мудростию их творений. Ей, святителю Божий, о мире всего мира Господа умоли, страну нашу твоим предстательством в мире и безмятежии соблюди; вся люди отечества нашего в добром расположении друг ко другу сохрани и чужды междоусобных нестроений покази; вся грады и веси добре сохрани, святую веру в людех непорочну соблюди. Буди всем нам скорый помощник в нуждах наших, да тобою окормляеми, мирно и благочестно проживем в жизни сей, да сподобимся и вечных благ

восприятия на Небеси, славяще и превозносяще  
Отца и Сына и Святаго Духа и твое милостивное  
о нас предстательство во веки веков. Аминь.



ПОЛНЫЙ  
**АКАФИСТНИК**  
КАНОНИЧЕСКИЙ

АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ

І

НОВОЕ  
\* НЕБО